

თბილისი. ვ. ი. ლენინის სახელობის „დინამოს“ სტადიონი. 20 ივლისი.

„დინამო“ (თბილისი) – „ჟალგირისი“ (ვილნიუსი) 2:1

„დინამო“: გაბელია, კეტაშვილი (მიქაბერიძე, 79), ჩივაძე, ჭელია, გურული, კაკილაშვილი, სვანაძე, სულაქველიძე, ჩელებაძე, ცაავა, მესხი.

„ჟალგირისი“: იურკუსი, ტამულიაფიჩუსი, სუკრისტოვი, მაჟეიკისი, იანონისი, ტაუტკუსი, ბარანაუსკასი, მაცკიაფიჩუსი, იაკუბაუსკასი, რასიუკასი, ნარბეკოვასი (ბუზმაკოვი, 40).

მსაჯი: ო. ჩინიონოვი (მოსკოვი).

გოლები: სულაქველიძე (45), ჩელებაძე (58, პენალტი), ბარანაუსკასი (69).

დუბლიორები – 1:2.

ნათქვამია, გამარჯვებულებს არ ასამართლებენო. ჩვენ არც ვაპირებთ ამას, მით უმეტეს, რომ თბილისის „დინამომ“ კარგა ხნის „შესვენების“ შემდეგ, როგორც იქნა, შეძლო საკავშირო ჩემპიონატის კალენდარული მატჩის მოგება. მაგრამ ის კმაყოფილება, რაც ჩვეულებრივ, ჩვენი გუნდის გამარჯვებისას განვიცდით ხოლმე, ამჯერად არ გვიგრძნია. შესაძლოა, ვინმემ მეტისმეტი პრეტენზიულობა დაგვწამოს, მაგრამ სათქმელი მაინც უნდა ითქვას: თუ მოგებამ თავისთავად ყველა გაგვახარა, დინამოელთა თამაშის ხარისხი ჯერჯერობით მაინც ვერ არის ისეთი, როგორსაც მათგან მოითხოვენ სპეციალისტები, გულშემატკივრები, უპირველეს ყოვლისა – მწვრთნელები.

„ჟალგირისი“ აშკარად არ იყო „განწყობილი“ ორი ქულის ასაღებად. იგრძნობოდა, რომ სტუმართა გუნდს ფრევ სავსებით დააკმაყოფილებდა, ყოველ შემთხვევაში, მთელი პირველი ტაიმის მანძილზე ვილნიუსელები ერთხელაც არ დამუქრებიან მეტოქის კარს და გაბელია, შეიძლება ითქვას, უქმად დატოვეს. ცხადია, როცა მიზნად ერთი ქულის მოპოვებას დაისახავ, ყველაზე მეტად საკუთარი კარის უსაფრთხოებაზე ზრუნავ. ისიც სავსებით გასაგებია, რომ „ჟალგირისი“ საშუალო ტემპით, აუჩქარებლად მოქმედებდა და ცდილობდა „დინამოც“ ასეთ თამაშზე დაეყოლებინა. უნდა ითქვას, რომ ვილნიუსელები უმეტეს შემთხვევაში, ახერხებდნენ კიდევ ამას – დინამოელები, როგორც წესი, დიდ დროს ანდომებდნენ შუა მინდვრის გადალახვას. იშვიათად მიმართავდნენ საშუალო და გრძელ გადაცემებს, რაც „ჟალგირისის“ წისქვილზე ასხამდა წყალს.

საკმარისი იყო თბილისელ ფეხბურთელებს ოდნავ მეტი სიჩქარით დაეწყოთ თამაში, რომ იურკუსის კართან მაშინვე იქმნებოდა სახიფათო სიტუაციები. გავიხსენოთ, თუნდაც, კაკილაშვილის სწრაფი გარღვევა, რომელიც მეკარის პირისპირ გასულმა ჩვენმა ნახევარმცველმა უხეირო დარტყმით დაასრულა (მე-13 წუთი), ან ჩივაძე-ცაავა-

ჩელებადე-მესხის ლამაზი კომბინაცია, რომელიც სტუმართა საჭარმოს მისადგომებთან ჩაიშალა (32-ე წუთი).

35-ე წუთზე კაკილაშვილმა კარგ პოზიციაში გაიყვანა მესხი. მან ჯერ დაკარგა ბურთი, მერე ისევ დაიბრუნა და დაარტყა კიდევ, მაგრამ ამ დარტყმას გოლი არ მოჰყოლია. ვილნიუსელთა ერთ-ერთმა მცველმა ცარიელი კარიდან თავით გაიტანა ბურთი. პირველი ტაიმის ბოლო წუთზე მასპინძლებმა კუთხურის მიწოდების უფლება მოიპოვეს. ცაავასგან ბურთი ჩელებადემ მიიღო და მცველთან ბრძოლაში შეძლო კარის მიმართულებით დარტყმა. იქ კარგად ითამაშა სულაქველიძემ და ანგარიშიც გახსნა.

შესვენების შემდეგ „ჟალგირისი“ შედარებით გააქტიურდა და 53-ე წუთზე კინალამ გოლიც გაიტანა: მასპინძელთა მცველებმა შეუფერხებლად დარტყმის საშუალება მისცეს ბუმბაკოვს და ბურთი სულ მცირე მანძილით ასცდა გაბელიას კარს. სამი წუთის შემდეგ უკვე დინამოელებს მიეცათ ანგარიშის გაზრდის შესაძლებლობა, მაგრამ მესხმა კარში დარტყმის მაგივრად ცაავას მიანოდა ბურთი და ეს შანსიც დაიკარგა.

გავიდა კიდევ ორი წუთი და ანგარიში გაზიარდა: ვილნიუსელთა ერთ-ერთმა მცველმა საკუთარი კარის სიახლოვეს წააქცია გურული. ჩელებადემ ზუსტად დაარტყა 11-მეტრიანი.

დარჩენილ 20 წუთში „ჟალგირისის“ უპირატესობა აშკარა იყო. გარდა იმისა, რომ ერთი ბურთი გაქვითეს (ბარანაუსკასი, 69-ე წუთი), სტუმრებს კიდევ რამდენიმეჯერ შეეძლოთ გოლის გატანა (ორჯერ მეტად სახიფათოდ დაარტყა იაკუბაუსკასმა), მაგრამ ანგარიში უცვლელი დარჩა. დინამოელები ნაადრევად დამშვიდდნენ და, თუ მათ ამჯერად მაინც შეძლეს გამარჯვების მოპოვება, სხვა დროს ყურადღების ასეთ მოდუნებას შეიძლება სხვა შედეგიც მოჰყვეს.

დავით კაკაბაძე
ლელი 22.07.1986

დუბლიორთა მატჩი

გუშინ თბილისში გაიმართა უმაღლესი ლიგის დუბლიორ ფეხბურთელთა საკავშირო გათამაშების XVIII ტურის შეხვედრა. ადგილობრივმა დინამოელებმა მიიღეს ვილნიუსის „ჟალგირისი“.

მატჩი დამთავრდა „ჟალგირისის“ გამარჯვებით – 2:1.

ლელი 20.07.1986